

Gui'ch yaløj guxhaal San Pabl loj Timoteo

Rugajpdioz Pab Timoteo

¹ Naj Pab, najn tijb xiapó stol Jesucrist por xguialrniabee Dios b́en rýjn perdon dux tol ree ně por Jesucrist b́en rayagbee ree gui't stijb. ² Cucan gui'ch guie par lýj Timoteo, din par naj lýj naj zi'cgajc da xi'nan guial tiblojzi raliduladx Jesucrist. Dux Dad ree Dios ně Dad Jesucrist güünle' lýj, yayaman lýj yabe'cdxe tēēman luxdool.

Rēb Pab loj Timoteo xcwent ree b́en rusquiee

³ Zi'c rnin lojl chi briin za'n niz Macedonia, guial yaya'n l guiedx Éfeso din nabeel tio'p choon ree bejn ni chitēē rulüü reeman bejn ree ni ad najt diidxli. ⁴ Ad chililadx reeman ni rbēēguijc ree bejn, ad guidxga' tēē reeman ban za reeman, o chu rajc reeman xbengol gulal reeman, din ad ni guint ree gagnē laa reeman par gusnuu chililadx reeman xtiidx Dios.

⁵ Canabeen lýj din güün reeman zian din guiguien guial diidxli rēn lasa' reeman, achet naladx reeman din guiguien tēē guial guidib luxdoo reeman rliladx reeman xtiidx Dios. ⁶ Din yu' reeman ad rýjntri zian guial ganax ree ni ren ni ad rýjnt ree sirv rü reeman. ⁷ Rēn reeman gulüü reeman bejn ree xhienaag naj xley Dios, abi' ni'qui laa reeman ad ragbeet xhie rēn guiēb ni rniece reeman ni'quid rignia't reeman ni naladx reeman naj zagdxe culüü reeman bejn ree.

⁸ Dunuj ree rayagbee guial zagdxe naj ley guin par b́en rignia' xhie sirv rýjnan. ⁹ Abi' rayagbee ree guial ad baneet Dios ley guin par ree b́en naban xnejz niz lojman,

Gui'ch yaloy par Timoteo 1:10 Gui'ch yaloy par Timoteo 1:17

baneeman ley guin par täd ree bejn casti, bén naban ree zi'ctzi naj xixgab reeman, bén ad ruzoobt ree diidx, bén ad yu'guijct ree Dios, bén rüjn ree dol, bén ad rajpt ree Dios respejt, bén ad rüjnt ree naguiejn guiën reeman Dios, bén rugüjt xdad xnгаа, në par gra ree bén rugüjt bejn, ¹⁰ rüjn tēen sirv par xcasti ree bén za'nē xinguaaaw o béngunaa ren, par ree xin ruladx lasa' xinguaaaw gajc o béngunaa ruladx lasa' béngunaa gajc, në par ree bén rban bejn ree par guto' reeman laa reeman zi'c mojs, nētēē par ree bén rusquiee në ree bén ruza't Dios par sudxi'chnē xguialrusquiee reeman në par gra ree bén rüjn xcontr ni naj diidxli. ¹¹ Diidxli guie ree naj ni zēēd ree loj xtiidxza'cdxoon Jesucrist. Dux Dad ree Dios, bén rayal respejt, laaman naj bén basa'nnē naj diidx guin ree din gatiechan laa reen.

Xhienaag baya Dios Pab

¹² Quixtēē Dad Jesucrist laaman cayagnē naj, rajp tēēman naj confianz abi' bacaabeeman naj par gatiechan xtiidxaman, ¹³ majsi yaloy gunen laaman diidxguijdx abi' guzunaalan bén rliladx ree laaman din gūnan laa reeman ni mal abi' dād naya bennē'n laa reeman. Per Dios bayaman naj guial ad bignia'tan ni cayūnan din gad naj chililadx Jesucrist. ¹⁴ Abi' dād benza'c gojcaman con naj, balūūman naj xhienaag chililadxan balūū tēēman xhienaag guiēnan Dad Jesucrist.

¹⁵ Diidxli ni ganin lējt, rayal chililadx bejn: guial Jesucrist bi't loj guidxliuj par gūnman xtol bejn perdon, abi' loj gra ree bejn naj naj mazri bēndol. ¹⁶ Per majsi najn mazri bēndol, baya Dios naj abi' gojp Jesucrist naj pacens din gagbee ree bén chililadx xhienaag rajp Jesucrist pacens par chililadx bejn xtiidxaman, abi' zian gap reeman guialnaban tiblyaa con Dios. ¹⁷ Zeel zianczi

rayal yaya'p reeman respejt yaza't tää reeman zagdxe guial najman rey bén ad yu't dxej guiët, abi' rajpaman guialrniabee par tiblyaa guial tijbzi laaman naj Dios abi' achut rajc ruguiaa laaman. Amén.

¹⁸ Timoteo, par naj lüj naj zi'c da xi'nan zeel rnin lüj been zi'c guneë reeman xcwentil diizd yaløj, abi' zi'c tijb suldad ni rej loj wadijl ad guidxebil niz loj ree bén za' ree contr xtiidx Dios. ¹⁹ Guzudxi'ch loj ni rliladxil Jesucrist, been tää ganaxzi ree xgab zagdxe par güünl zi'c rayal. Din yu' ree bejn guial ad rüjnt reeman zian, yan ma banijt reeman ni rliladx reeman Dios. ²⁰ Zian ma guzajc ree Himeneo con Lejandr, zeel ma bayün laa reeman loj satanás din gusiid reeman guial ad rayalt guinieë reeman Dios diidguijdx.

2

Xhienaag cwedx guiniab bejn Dios

¹ Yaløjdoon ni rnin lojdi naj guial cwedx guiniabidi Dios, cwedx guiniabidi laaman por gra ree bénguidxliuj, gudëëd täädi quixtää lojman. ² Rayal yarejdx yanaab ree Dios por ree rey në por gra ree guxtis loj guidxliuj din chile' yabajn ree zagdxe gusnuu tää yabajn ree zi'c rën Dios. ³ Din laan naj ni zagdxe ni rayuladx tää dux Dad ree Dios, bén rüjn perdon dux tol ree, ⁴ bén rën guial gra bejn gac perdon guidxin tää dxej gagbee bejn xhie rën guiëb xtiidxliman. ⁵ Din tijbzi laaman naj Dios, abi' por tijbzi Jesucrist zile' yaya'p ree nejz par loj Dios guial bi'taman loj guidxliuj zi'cgajc tijb bénguidxliuj. ⁶ Güjtaman loj crüjz persi gudixxaman por xtol gra ree bénguidxliuj, zian naj ni balüü Dios bejn chi bidxin dxej bacaabeeman gac zian. ⁷ Zeel bacaabeeman naj gacan xi apóstol Jesucrist din gatiechan xtiidxaman, në par gusidan bén ad najt ree

Gui'ch yaløj par Timoteo 2:84Gui'ch yaløj par Timoteo 3:3

bén Israel conin naj diidxli, xhie tëë naag chililadx reeman Jesucrist, walin ad rusquieetan.

⁸ Yan rënan guial guidibczi cwedx guiniab ree xinguaaw Dios, guilies yaa reex con guidib luxdoo reex sin dol, sin guialrdxe'ch në sin wadijl. ⁹ Rën tëën guial ree béngunaa su reeman zi'c rayal, ad tëdlaj suchaaw reeman con or, në ree perl në ree vistid zagdxo o guial tëdlaj güünchaaw guidxguijc reeman. ¹⁰ Din mazri zagdxo güün reeman ni naj zagdxo, zi'c rayal güün ree béngunaa ni ma zinal xnejz Dios. ¹¹ Abi' rayal gucaagdiajgzi reeman ache guiniee reeman chi rulüü ree xinguaaw xtiidx Dios. ¹² Din ad zatiëëbtan guial gulüü tijb béngunaa bejn ree chi radxaag lasa' reeman par gucaagdiajg reeman xtiidx Dios, ad rayalt nabee béngunaa xinguaaw, rayal gucaagdiajgzaman. ¹³ Din Dios, yaløj Adán beenchaawaman, dxelri Eva. ¹⁴ Din ad Adánt basquiee reeman, yaløj Eva basquiee reeman, abi' por guialrusquiee guin beenman dol. ¹⁵ Per zajc gac béngunaa perdon, bal güün xchiinman zagdxo guial najman na, bal gusnuu chililadxaman Dios, guiënman bejn ree guiban tëëman xnejz.

3

Xhienaag guiban ree bén rniabee

¹ Gol badxe'guijc da diidxan: Bal chu bén rën gap guialrniabee loj gra ree bén rliladx Jesucrist par gulüüman laa reeman xnejz Dios, zagdxequi naj ni rënman güünman. ² Per bén rajp guialrniabee guin rayal güünman zi'c rayal chitëë chu guinieeguidx laaman. Rayal chu' tijbzi lacheelaman, guibanman zagdxo chu' tëë xquiarguiejnman din gap ree bejn laaman respejt. Gacaman benza'c con ree bén rdxin lidxaman, gac tëëman tijb bén rignia' par gulüüman bejn ree. ³ Ad rayalt gacaman bengui', ni'qui bén rguuil wadijl ad rayal tëët yaguuilaman mod par tia'man xmilia

Gui'ch yaløj par Timoteo 3:45Gui'ch yaløj par Timoteo 3:13

ree bejn, rayal gacaman benza'c con chutëez, gac tëeman Bén naxanladx ad zazëëbladx tëtaman milia. ⁴ Rayal nabee lidxaman zi'c rayal din gulüü ree xi'nman xhienaag gap reex respejt guzoob tëë reex diidx. ⁵ Din bal id rajc rniabee lidxaman, ¿xhieza naag nabeeman Bén rililadx ree Jesucrist? ⁶ Zeel tijb Bén qui guzuløjri rililadx Jesucrist, ad rayalt nabeeman loj ree Bén ma rililadx chitëë guilies xvalor gajcaman abi' yayalaman lasa' casti ni bayal xindxab. ⁷ Bén rajp guialrniabee guin xt ree Bén ad rililadxt Jesucrist rayal güünbee laaman guial najcaman benza'c chitëë yaya'nxtuman abi' güün xindxab laaman gan.

Ni güün ree Bén rüjn yudar Bén rniabee ree

⁸ Yan ziangajc ree Bén ma cwabee par güün reeman yudar Bén rniabee ree, rayal güün reeman zi'c rayal din gap ree bejn laa reeman respejt, güün cumplid xtiidx reeman, ad guië' tëë reeman, ad yaguiil tëë reeman mod par tia' reeman xmilia ree bejn. ⁹ Con xgabza'c chinal reeman ni ma balüü Dios dunuj ree. ¹⁰ Zeel yaløjxgaj rayal gac reeman prueb abi' bal id xhie xfalt reeman, dxel ma zile' guzuj bejn laa reeman din güün reeman yudar Bén rniabee ree. ¹¹ Ziangajc ree Béngunaa ni ma cwabee par güün reeman yudar, rayal güün reeman zi'c rayal din gap bejn laa reeman respejt ad zaneeguijdx reeman bejn, rayal guiban reeman zagdx abi' güün cumplid xtiidx reeman. ¹² Abi' ree xinguaaaw cwabee guin par güün reex yudar Bén rniabee loj ree xbejn Cristo, tijbzi lacheel reex rayal chu', nabee tëë lidx reex con xi'n reex zi'c rayal. ¹³ Din Bén rüjn ree sirv zi'c rayal ad respejtzi rajp bejn laa reeman, sin guialrdxeb ma zile' guiëb reeman xhienaag rililadx reeman Jesucrist.

Naroob naj Bén raliduladx ree

Gui'ch yaløj par Timoteo 3:146Gui'ch yaløj par Timoteo 4:6

¹⁴ Gagnë Dios chile' guialan guidganan lüj. Per cucan gui'ch guie, ¹⁵ din bal gaglaan ma ragbeel xhienaag guiban bejn delant loj los demasri ree xbejn Dios, bén ma naj ree xbejn Dios naban, abi' za'dxi'ch reeman rulüü tää reeman xtiidxliiman. ¹⁶ Dunuj ree rayagbee guial dád bén narooob najman, bén raliduladx ree:

Bi'taman loj guidxliuj zi'c tijb bénguidxliuj,
rëb xSprijt Dios guial laaman naj bén naya
abi' baguiaa ree anjl laaman bi'taman loj guidxliuj.
Bre'ch xtiidxaman loj ree bén ad najt bén Israel,
guidibczi bililadx bejn laaman abi'
baca' Dios laaman xanyabaa.

4

Bén rusa'n ree guialrliladx reeman Jesucrist

¹ Ma bagojnchaaw xSprijt Dios guial zëäd ree dxej ni yu' ree bejn gusa'n guialrliladx reeman Jesucrist, mazri guidxga' reeman xtiidx ree bénrusquiee në gra ree ni zëäd por xindxab. ² Mazri guidxga' reeman bénrusquiee ree, bén wed rüjnz ree, bén achetri ree rzajc guial rüjn reeman dol din ma naya' reeman zian. ³ Guiëb reeman guial ad najt guial guxhliaa ree bejn ad zajw tää reeman graløj. Per Dios badxe' graløj guialraw par gaw ree bén rliladx laaman, bén ma ragbee ree conin naj diidxli abi' gudëäd reeman quixtëe lojman. ⁴ Din gra ni badxe' Dios naj zagdxë, achet ni rayal cwexuu bejn tia'man bal gudëëman quixtëe chi cayawaman laan. ⁵ Din chi rarejdx ranaab ree Dios con xtiidxaman rüjnle'man guiyc ni yadaaw ree.

Bén rüjn sirv zagdxë loj Jesucrist

⁶ Zeel bal rulüül bén rliladx ree Jesucrist zi'c ma rnin, dxel cayüjnquil sirv Jesucrist zi'c rayal, abi' zian gusnuu gusiidil mazri guial loj ni ma rajquil xcwent guialrliladx

Gui'ch yaløj par Timoteo 4:77Gui'ch yaløj par Timoteo 5:2

guin nē ree diidxa'c ni zinalil. ⁷ Per ad guidxga'll ni rbēēguijc ree bejn, ni ad najt ree diidxli por Dios, mejorli basnuu basiid sudxi'chil guibanl zi'c rēn Dios. ⁸ Zagdxe naj par gūūn bejn graløj ejercijs par gacaman gojl, per loj gra xhietēēznin mazri lasajc guiban bejn zi'c rēn Dios. Din ad lojtzi guidxliuj guie gūūn sirv guial naban bejn zi'c rēn Dios, nēgajc xanyabaa lod gap bejn guialnaban tiblyaa. ⁹ Dunuj ree rayagbee guial ni diidxli naj ree diidx guie, abi' rayal chililadx gra bejn laan. ¹⁰ Zeel majsi cayza'can ni cayza'can, per cayguieenan ni cayguieenan guial raliduladxan Dios naban, bēn naban par gūūnman yudar gra ree bejn, per mazri bēn rliladx ree laaman.

¹¹ Zian rayal gusiidil bejn ree gūjdx tēē loj reeman din gūūn reeman zian. ¹² Gojp cudad chitēē guiēb ree bejn guial achet sirv lūj guial ad wayajctil bengol. Mejorli been nagueijn din gaquil tijb ejempl par ree bēn rliladx Jesucrist, zi'c xhienaag rül diidx, zi'c nabanl, zi'c rēnl ben ren ree, zi'c rliladxil Dios nētēē por ree xixgabza-'quil. ¹³ La'tgaj guialan, basnuu biil xtiidx Dios loj ree bejn, guneenē reeman balūū tēē reeman xhie rēn guiēb xtiidx Dios. ¹⁴ Ad yayanladxil gūūnl zi'c rayal gūūnl por quiargueijn ni banee Dios lojl chi badxiib yaa ree bengol guijquil chi gogbee reeman guial lūj naj bēn gule Dios.

¹⁵ Badxe'guijc diidx guie ree din gagbee gra ree bejn guial cusnuu zēl delant. ¹⁶ Gojp lūj con ni rusiidil bejn ree. Guzujdxi'ch loj ni ma ragbeel, zian yabēē lūj gajc loj casti yabēē tēēl bēn cucaagdiajg ree xtiidxil.

5

Xhienaag gūūn Timoteo con ree bēn rliladx Jesucrist

¹ Ad tilnēl tijb bengol, badēēman consejw zi'cgajc xdadil, abi' xin naj ree xinguiag, badēē reex consejw zi'cgajc bijchil. ² Ziangajc bēngunaa bengol ree badēē

Gui'ch yaløj par Timoteo 5:38Gui'ch yaløj par Timoteo 5:13

reeman consejw zi'cgajc xniaal, abi' biinguiag ree, badëe reem consejw zi'cgajc bizanl con xgabza'c.

³ Bidxga' ree béngunaa bizëjb ni diidxli achut rajp. ⁴ Per bal tijb béngunaa bizëjb guin yu' ree xi'n o xiajg, dxel yaløj laa reex gusiid guidxga' xfamil, güün reex yudar din yaguijx reex ni baslaa xdad xniaa reex laa reex. Din zian naj zagdxé, zian tëë ruladx Dios. ⁵ Béngunaa naj diidxli bën bizëjb, bën ad rajptri chunin loj guidxliuj guie, tijbzi Dios naj bën yu'guijcaman güün laaman yudar dxel ad rucwëëzt rbejdx rniabaman laaman dxej guiaal. ⁶ Per tijb béngunaa bizëjb ni rüjn ni rëntzi, laaman naj zi'c tijb bengüt guial ad yu'guijctaman Dios. ⁷ Bagojn gra ree diidx guie bën ma rliladx ree Jesucrist chitëë chu guinieeguijdx laa reeman. ⁸ Din bën ad rüjnt yudar xcompniar, abi' ni'qui xfamilaman bën zojb ree lidxaman ad rüjntaman yudar, laaman ma basa'n ni rliladxaman abi' piorli najman guial loj ree bën ad rliladxt Jesucrist.

⁹ Ad tia'l laj chutëëz béngunaa bizëjb par gac reeman yudar, naabzi ree béngunaa bizëjb bën ma nadëd ree gayojn ijz abi' ad guzunëtaman bën ren la'tgaj naban lacheelaman. ¹⁰ Bal nünbee tëë ree bejn laaman guial beenman ganax ree ni rüjn sirv, bal baslaa ree xi'nman zi'c rayal, bal badëe lidxaman baya'n ree bejn bal gojcaman benza'c con ree bën rliladx Jesucrist bën bidxin ree lidxaman, bal beenman yudar bën rzagdiaj ree, bal been tëëman naguiejn beenman ganax ni zagdxé.

¹¹ Per ad tia'l laj ree béngunaa bizëjb benguiag ree, din despuejs rën reeman guxhliaa reeman abi' ad rüjntri reeman ni rayal güün reeman por Cristo guial rën reeman guxhliaa reeman stijb. ¹² Dxel rüjn reeman dol guial ad rüjntri reeman ni ma been reeman compromis con Cristo. ¹³ Abi' tëë ree benguiag guin zë reeman yu yu, zianz rajc reeman costumbr achetczi rüjn reeman. Abi'

ad laatzan, rzuloj ruza't reeman bejn, ru reeman loj xhi-etëëznin abi' rniee reeman ni ad rayalt guiniee reeman.

¹⁴ Zeel rënan guial bën naj ree béngunaa bizëjb benguiag, mejorli guxhliaa reeman stijb, chu' xi'n reeman nabee tëë lidx reeman zi'c rayal, chitëë gudëed reeman mod guinieeguijdx ree bën ralen ree dunuj ree laa reeman.

¹⁵ Din yu' ree béngunaa bizëjb ma guro'nladx reeman xnejz Dios abi' ma zinal reeman xnejz xindxab.

¹⁶ Abi' bal tijb bën rliladx Jesucrist naj xfamilaman tijb bën baya'n bizëjb, dxel laaman rayal güün yudar béngunaa bizëjb guin chitëë gacan mazri carg par ree dux compniar ree bën rliladx ree Jesucrist. Zian güün reeman yudar béngunaa bizëjb diidxli achutri rajp loj guidxliuj guie.

¹⁷ Bén rliladx ree Jesucrist rayal gap reeman respejt bën rniabee laa reeman në ree bën rniee ruliüü tëë xtiidx Dios zi'c rayal, gudëë tëëdi loj reeman gra ni ryaadx reeman.

¹⁸ Din loj xtiidx Dios rëb: “Ad gudxe'di guijxh ro' ree begui'xh la'tgaj cayüjn reeb dxiin”, rëb tëë loj xtiidx Dios: “Rayal gax bën rüjn dxiin”.

¹⁹ Ad guidxga'di ni rudxiib ree bejn guijc tijb ree bën rniabee ree bën rliladx Jesucrist, bal id yu' tio'p choon ree bejn rëb guial diidxli naj ni rniee reeman por laaman.

²⁰ Per bal tijb bën ma ca' guialrniabee rusnuu rüjnman dol, rayal guinieenël laaman delant loj gra reeman din guidxeb los demazri reeman.

²¹ Yan por Dios, por Jesucrist në por ree anjl ni ma gulejman, naj rni badxe'guijc been tëë zi'c ma rnin ad cwel loj ree bejn, tiblojzi been con gra reeman. ²² Gojp cudad cwel tijb bën ni nabee din ad ragbeetil bal yu' ni mal cayüjnman, dxel güün ree bejn xgab guial nëgajc lüj ruladx ni cayüjnman. Gojp cudad graløj ree dol.

Gui'ch yaløj par Timoteo 5:2310Gui'ch yaløj par Timoteo 6:7

²³ Nē guial guië't guië't ragxuu lēnl guial ad nadaant lēnl, ad rē'l nijs lagajzi mejorli gu' tibda'n vin.

²⁴ Yu' reeman laa rguien gajc xhie dol cayüjn reeman diizd chi gad reeman gudëed cwent loj Dios, per yu' reeman ad rguient xhie dol cayüjn reeman xt chi yadëed reeman cwent loj Dios. ²⁵ Ziangajc yu' ree bēn ni laa rguien gajc ni zagdxē ni cayüjn reeman, abi' yu' reeman ni'quid rguient ni zagdxē ni cayüjn reeman, per yu' dxej gagbee ree bejn laan.

6

¹ Gra ree mojs rayal gap reeman respejt xpatron reeman chitëe chu guinee diidxguijdx contr Dios o contr xtiidxaman ni caylūūn. ² Abi' bal rliładx patron guin Jesucrist dxel rayal gap reeman laaman mazri respejt guial nēman rliładx Jesucrist zi'cgajc laa reeman. Abi' tēe rayal güūn xchiin reeman zi'c rayal guial cayüjn reeman sirv tijb xcompniar reeman bēn rliładx Jesucrist compniar ni rēn reeman. Zian balūū ree bejn güjdx tēe loj reeman din güūn reeman zian.

Guialnaza'c ni naj diidxli

³ Bal yu' bēn rulūū diidx ni ad najt zi'c xtiidxza'c Dad Jesucrist ni'qui zi'c raliduladx ree Jesucrist ad rulūūtaman bejn ree, ⁴ najzaman bendxal. Din ruladxaman tildiidxaman abi' ni'quid xnejzt rnieeman, dxel ni zēed guialnadēdloj, guial rdxe'ch, guial rniee diidxguijdx abi' ad rliładxtri lasa' reeman, ⁵ ad rucwēzt rdil reeman por ree ni ad rüjnt sirv ni yu' guijc reeman guial ad ragbeet reeman ni naj diidxli, dxel naladx reeman guial chililadx reeman Jesucrist ma gac reeman ben rijcw. Bēn naj ree zian, biquied loj reeman. ⁶ Dad ben rijcw naj bejn chi ma rliładxaman Jesucrist, per bēn za' conform con ni rajptzaman. ⁷ Din achet budnē' ree loj guidxliuj ache tēet

Gui'ch yaløj par Timoteo 6:811Gui'ch yaløj par Timoteo 6:17

zajc yunë' ree chi yayëjt ree. ⁸ Bal raya'p ree ni yadaaw ree në lajd ni yadojt ree con laan rayal yaya'n ree conform. ⁹ Per ree bën rzëëbladx gac reeman rijcw loj guidxliuj guie ad rile't sudxi'ch reeman, laa rüjn gajc xindxab laa reeman gan. Mazri rüjn reeman xgab ni ad rüjnt sirv abi' rüjn reeman ni ad rayalt güün reeman ni rüjn persi rnijt reeman. ¹⁰ Din guial rzëëbladx milia laan naj xliuj gra ni mal. Abi' yu' reeman por guialrzëëbladx guin ma basa'n reeman ni rililadx reeman Dios abi' laagajc reeman cusagdiaj laa reeman.

Ni rayal güün Timoteo

¹¹ Per lüj Timoteo, xbejn Dios, briica loj ree ni mal guin. Been naguiejn guibanl zagdxe, guibanl zi'c rën Dios, bililadxaman, gojc bën naxanladx, gojp pacens guyën tää ree ben ren. ¹² Been da't naguiejn guzudxi'ch loj ni rililadxil xtiidx Jesucrist. Ad gusëëbil guialnaban ni naj guialnaban tiblayaa, din par zian gulejman lüj abi' rëbil delant loj zien ree bejn xhienaag rililadxil Jesucrist. ¹³ Yan, por Dios bën razaladx guialnaban loj gra ni yu' loj guidxliuj në por Jesucrist bën ni gunee sin guialrdxeb loj Poncio Pilato, naj rniabee lüj ¹⁴ din guzobil diidx güünl ni rnin lojl, sin guial guchaal xhienin chitëë guiëb ree bejn guial ad cayüjntil xnejz. Zian been xt dxej ni gui't Dad Jesucrist stijb. ¹⁵ Gui'taman dxej ni nabee Dios gui'taman, Dios bën rayal respejt bën naj tijbzi Dios rajp tääman gra guialrniabee, bën naj xrey ree rey naj tääman xDad ree dad. ¹⁶ Bén ni ad yu't dxej guiët, Bén ni za' lod mazri nayni lod achut zajc chibig. Ni'qui tijb bénguidxliuj ad waguiaat laaman ad zajc täät guguaa bejn laaman. ¡Par laaman naj respejt në guialrniabee par tiblayaa! Amén.

¹⁷ Bén naj ree benrijcw loj guidxliuj guie, güjdx loj reeman ad güün reeman benro' ad cu'guijc tää reeman

Gui'ch yaløj par Timoteo 6:1812Gui'ch yaløj par Timoteo 6:21

gual ni rajp reeman najn par tiblayaa, din gualnaza'c ni rajp bejn yu' dxej yaran. Mejorli cu'guijc reeman Dios bèn naban din laaman razaladx da't dunuj ree graløj din chu' du luxdoo ree nix. ¹⁸ Gùjdx loj reeman din gùün reeman ni zagdxe, gùün reeman zien ree ni rùjn sirv, cu' tää luxdoo reeman zagdxe gùün reeman yudar bènprob ree. ¹⁹ Abi' zian guto'p reeman gualnaza'c ni gùün laa reeman yudar loj ree dxej ni zëed din yayal reeman gualnaban tiblayaa xanyabaa.

Xconsejw Pab

²⁰ Timoteo, badxe'guijc ni rayal gùünl, Ad guidxga'l diidxdxuudx ree xcwent ree ni ad rùjnt ree sirv, ni'qui ree diidx rusquiee, ni'qui ree diidx ni rü ree bèn ni naladx gual rajc da't reeman abi'za ad walit ni rajc reeman. ²¹ Din yu' ree bèn rùjn zian yan, abi' ma basa'n reeman gualrliladx reeman Dios.

Dios gùünle' lùj Timoteo. Amén.

Xtiidx Dios

New Testament in Zapotec, Santo Domingo Albarradas
(MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

